

Giudicà il program nov

■ (cp) **A chaschun da l'ultima sesida ha il Cussegl dal public SRG.R tematisà la midada da program dal Radio Rumantsch (RR). RTR Radiotelevisiun Svizra Rumantscha vegn ludada d'avair fatg quest pass.** Ultra da quai èn era vegnidas tematisadas las emissiuns dal magazin «Cuntrasts» dal favrer e mars 2012. Ils responsabels da RTR survegnan bunas notas per la segunda fasa d'observaziun. L'accent per questas observaziuns vegn mess quest onn tranter auter sin l'emissiun «Cuntrasts» e sin la midada dal program da radio.

La midada da program realisada da curt dal Radio Rumantsch survegn in bun feedback. Il Cussegl dal public SRG.R constatescha ch'il Radio Rumantsch para ussa pli viv e pli adattà als basegns dal public. La midada è reussida, dat nov schlantsch e fa plaschair da tadlar l'emettur. Sco public en mira vegnan consideradas persunas a partir dal 30avel onn da la vita. Il program da musica durant il di è però concepì era per in public pli giuven.

Era la campagna da reclama che sa serva dal Code QR pledenta in auditori plitost giuven e tecnicamain versà. Singuls puncts da critica concernan il giu da la damaun «Kikeri6», nua che duai vegnir standardisà il timing, e la «Parada da hits» emessa la sonda. L'ultima chanzun da la «Parada da hits», tenor l'avis dal Cussegl dal public il highlight, na dastga betg vegnir interrutta suenter paucas secundas.

La primemissiun da «Cuntrasts» vegn mintgamai mussada la dumengia saira a las 17.25 sin SF1. La grupp da lavur è da

l'opiniun ch'ils temas vegnian elegids bain. Ultra da reportaschas e films documentars monotematics vegnan emess era magazins cun pliras contribuziuns curtas. Per l'emprima giada è vegnida trasmessa durant l'interval d'observaziun in'emissiun da la seria «L'album da ...» sco era l'emissiun da discussiun «Controvers» en consequenza da la dumengia da votaziun federala. La furma d'emissiun utilisada per l'emissiun «L'album da ...» è vegnida messa en dumonda. En pli è la discussiun davart la construcziun d'abitaziuns secundaras stada memia pulita e memia pauc cuntraversa.

Ils commembers dal Cussegl dal public SRG.R han prendì enconuschientscha da la regulaziun concernent il management da qualitat publicistic da RTR e dal carnet da duairs per il referent da medias RTR. Ultra da quai vegn elavurà en vista a la proxima sesida in concept per in premi da medias che vegn surdà dal Cussegl dal public SRG.R.

La proxima sesida dal Cussegl dal public SRG.R ha lieu il settember «extra muros» en Val Lumnezia. En il rom da quella seduta vegnan tractadas las emissiuns da l'avrigl fin l'avust 2012 dal magazin «Cuntrasts». Ina grupp da lavur accumpogna era vinavant la midada da program dal Radio Rumantsch. Plinavant sa participescha ina giunta ad in'observaziun comunabla da tut ils Cussegl dal public da la SSR. Las finamiras da quella observaziun comunabla èn da tegnair en egl ils magazins da consumers e da promover e rinforzar ulteriuramain la collavuraziun tranter las singulas regiuns linguisticas.